

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #1330772

Ass. Dir. Ehecutivo

Xiomara Arends

Redaccion Ehecutivo

Leo Maduro (hefe de redaccion)
Nicola Gonzalez (redactor ehecutivo)
Pilar Flores (redactor ehecutivo)

Redaccion

Benjamin Romero
Kenna Hernandez
Andreina Morillo

Departamento Digital

Cristian Soto Garcia

Ehecutivo di Benta

Sulaika Croes

email: sulaika.croes@cspnv.com

Linda Reijnders

Aviso y Arte

Sandra Loefstop
Lisa Tromp
Shannon Geerman

Administracion

Mariette Engelhart
Martha Arteta de Ariza
email: accounting@bondia.com

Distribucion

Jenny Kelly

Recepcionista

Rachelle Danje

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Dirksz

Colaboracion

Yakari Gabriel
Associated Press
Ret Karibense
Upload Media Aruba

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800 / Fax: 582-7044
Email: noticia@bondia.com
aviso@bondia.com
Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Screening ta bon... *Pero di antemano, por favor...*

E asunto di e proyecto hotelero na Sero Colarado ta hayando un rabo bastante largo, y den esaki no mester culpa e mensahero, cu den e caso aki tabata un medio di comunicacion. Ta papel di prensa, critico, pa investiga y publica loke a haya; asina simpel. Como e medio cu a tuma na su encargo pa haci averiguacion a base di e datonan suministra pa e mandatario concerni, nos mester bisa cu nos a haci un esfuerso pa mantene nos analisis na e hechonan, no e cantidad grandi di critica dedica por ehemplo na e persona di nacionalidad Venezolano cu a keda nombra como director di e compania desaroyador na Aruba. Si tabata corecto pa señala e existencia di e critica ey, cu ta señala e persona como intimamente liga na e regimen Chavista, cu no ta djis un gobierno cu mal actitud, manera tin mas. Ora ta asocia un persona cu Chavismo, nos ta papiando aki di relacion cu e regimen mas destructivo di historia di e continente aki. Y un di e aspectonan principal di nan destruccion tabata e sakeo enorme di rikesanan di e pais, cu enfoke special riba e robo cu a tuma lugar den e empresa estatal Pdvs. Nos no ta papiando aki di un par di miyon, ni di un par di biyon, pero di un robo di alrededor di 300 biyon dollar di Pdvs, y posiblemente di mey triyon dollar (500.000.000.000.000 dollar) di henter e pais, entre otro tambe di oro, coltan y otro material di e pais.

Lo ta logico pa pensa cu parti di e placa ey ta busca un caminda di bay; e no por keda Venezuela, pa dos motibo. Uno ta cu di mes ta busca moda di laga placa rindi, y esey na Venezuela ta hopi dificil. E mesun sistema economico cu a duna e Chavistanan asina hopi oportunidad pa horta, ta impedi nan gana placa como empresario capitalista. Ta pesey cu nan tabata busca, pa varios aña caba, pa deposita nan rikesanan horta na otro pais. Y ultimamente a bin un motibo acerca, y esey ta cu nan mes tambe ta mira cu e robo historico aki ta yegando su fin; motibo pa logra saca e recurso nan aki y inverti o warda nan na otro pais. Como pais bisiña, nos no por djis ignora e situacion aki. Y esey pa bon motibo. No ta nos como pais chikito ta dirigi mundo economico y financiero; nos mester simplemente cumpli cu e creciente control cu e paisnan mas prospero den e mundo aki ta eherce riba nos pa por controla esnan cu ta usa e sistema financiero global pa maneha placa, cu posiblemente ta procedente di narcotrafico, o mester sirbi pa financia terorismo.

Den e situacion actual, tur cos cu tin e label Venezuela cune, mester ta obheto di control riguroso, pa nos sa sigur cu nos no ta haya nos cu medida di por ehemplo Estadonan Uni contra nos banconan, pasobra ta sospecha, o peor, ta proba cu a coopera cu e fluhonan di placa di origen dudoso aki. Ta den e contexto aki nos mester interpreta e carta cu Banco Central a manda pa e banconan comercial, pa nan tira bon bista kico nan ta haci, den e caso specifico aki sigur. Y pakico den e caso aki sigur? Pasobra e elementonan cu nos investigacion a duna, no tanto contra e persona Chavista nombra director, sino mas bien e compania na Gran Bretaña cu a keda presenta como fondo di inversion, pa despues nos bin ripara cu ta un compania insignificante e ta, cu nunca por ta un partner serio den tramite di centenares di miyones di dollar pa un inversion di e magnitud proyecta. Y no ta nos a yega na e conclusion ey, di puro antocho, pero e hechonan cu nos a descubri den un registro publico Britanico a trece esey na superficie.

Y si tin hende ta kere cu loke a pasa awor ta un excepcion, nos kier djis recorda e sucesonan alrededor di e proyecto Fly Aruba, cu tambe a caba na nada pasobra no por a duna cuenta di e origen di e placa (200 miyon dollar) y e banconan comercial, cuidando nan lomba, e nenga di coopera pa e placa dreña. Algo similar por bay pasa den e caso aki tambe, y e carta di Banco Central ta muestra palpable di esey. Esey ta implica tambe cu no ta depende solamente di e opinion cu entidadnan gubernamental duna gobierno, unda gobierno por scoge pa ignora bon consejo, pero e 'vangnet' di seguridad ta den sector priva unda ningun banco comercial ta tuma riesgo cu suma grandi di placa dudoso, cu por costa nan masha caro mes ora sancion Mericano cuminsa cay.

Cu nos publicacion a causa asombro y hasta trastorno ta di comprende, pero gobierno mes por a evita tur esaki, haciendo nan 'due diligence' na tempo, esta di antemano, y no a la postre, ora cu prensa mester muestra e entidadnan gubernamental riba e posible riesgonan di e supuesto financistanan aki. Si banda di tur e esfuerso cu a hinca den haci propaganda pa e proyecto, a dedica mita dia na investigacion, no tabatin pakico pasa den tur esaki. O por ta cu no tin gana di investiga?